

Pest spezial por Lisa

Lisa Verginer á tut pert ales finales dles Olimpiades de Talian a Roma, cun dër n bun resultat

Concursc - Tla ediziun di 11 de merz ânse podü incundé che la jona Lisa Verginer da San Martin â davagné la seleziun provinziála dles Olimpiades de Talian, che ti pormetô da jí a Roma ales finales. Dai 17 ai 19 de merz éra stada tan inant, y ince dala capitala sö él gnü de boniscimes noeles. Deboriada cun 83 d'atri partezipanc, ê la studënta dl Lizeum Linguistich da La Ila pro i finalisc dles Olimpiades. Ara se trata de na competiziun de lingaz, te chëra che al vëgn mosoré les capacités linguistiches anter i studënc. Da trëi agn incá pó tó pert ince les scores todëscas y ladines de Südtirol, che á le talian sciöche secundo lingaz. Deboriada cun Lisa Verginer êl a Roma ince n secundo finalist de Südtirol, le jonn Philipp Augschöll dl Istitut Tecnich Economich da Balsan. A Roma á i dui studënc messü fá na proa scritta de trëi ores, olache al ê da desfiré cater eserzizi desvalis: chirí la parora falada, cunté na

storia, mëte jö n test informatif, sciöche ince realisé na intervista imaginara cun na personalité storica.

Por intrami i studënc de Südtirol é la proa jüda dër bun, insciö che ai á podü pié do na onoranza speziála sön la paladina d'onur "Scuola ufficiali Carabinieri". Le pest spezial - lion te n comunicat mené fora dala Provinzia de Balsan - i é gnü surandé da pert dla direturia generala dl MIUR (Minister dl'Istruziun, Universitè y Inrescida) Carmela Palumbo y dal comandant general di Carabinieri Tullio Del Sette. "I complimentënc ai dui davagnadus ti é ince gnüs fac dai insegnanc y dales insegnantes che i á acompagné a Roma, conscidran ince la concorënza y le nivel de dificulté dër alt dla proa", stlùj jö le comunicat. Lisa Verginer á arjunt 41,20 punc sön 58. Philipp Augschöll é rové a 38 punc sön 61. (pablo)

17-18-19 Marzo
2016



Lisa Verginer da San Martin y Philipp Augschöll pro la premiaziun dles Olimpiades de Talian a Roma.